

崇正同人系譜

卷七
卷八
卷九
卷十
卷十一

香港崇正總會編印



崇正同人系譜卷之七

人物二

名宦

吳六奇

清

吳漢

陳德靜

黃承箕

蕭翹材

鄺奕垣

楊之徐

李林

陳潤平

陳鶚薦

溫定瀾

李瑜

楊纘緒

張作舟

羅璿

徐廷芳

蕭宸捷

李象元

邱殿章

廖貞

楊瓊

湯伯獻

歐鐘諧

李端

巫榮

侯如樹

楊仲興

李元皋

藍欽奎

胡定

邱玖華

楊成梧

楊黼時

張昌甸

楊夢時

楊勳

葉鈞

葉承立

梁德隆

梁英佐

溫伯魁

歐堪善

劉善元

楊天培

楊演時

顏希琛

饒慶捷

趙希璜

顏檢

邱元遂

李文起

鄧彬

李運城

歐相箴

譚兆燕

李黼平

張道熾

王利亨

宋湘

林紹龍

蕭斯

李仲昭

張樹勳

張翺

吳蘭修

侯樞臣

顏伯燾

饒芝

楊從龍

練廷璜

邱建猷

張惟勤

張其翰

張其翮

李光彥

饒褒甲

李載熙

蔡嵩應

何探源

黃仲容

謝蘭省

鄧承修

何如璋

黃爾任

子基

李嘉棠

饒鳴鎬

黃遵憲

鍾兆清

郭應齡

[illegible]

名宦

清

吳六奇字葛如一字鑑伯豐順人少讀書不事家人產明季盜起六奇與弟標集鄉勇捍衛閭里明亡附桂王爲總名以舟師居南澳順治七年清兵下韶州六奇與碣石僞總兵蘇利迎降六奇貧時乞食粵東諸郡悉山川形勢請爲嚮導招撫各邑以自效十年潮鎮郝尙久反時靖南王耿繼茂剿李定國在肇慶靖南將軍喀喀木自江甯奉命征粵未至六奇晝夜固守以待援師越五月大軍至圍始解隨軍攻尙久六奇所部皆精銳以雲梯兵攻城尙久窘迫投井死潮州平特授掛印總兵開闢饒平

時海賊鄭成功詭稱受撫掠潮惠諸郡賊黨李增等寇饒平土賊江龍踞大埔鄭儼踞湯坑及劉道章皆爲內應六奇遣游擊曾蘭擊之賊遁詔褒六奇勲晉左都督在鎮以潮郡及大埔饒平學宮經兵燹捐俸修之旣而成功入寇陷揭陽澄海普寧三城六奇率所部攻揭陽先斫賊水營復連發二矢射城上賊渠黃廷廷中矢墜城下遁入舟六奇潛以巨艦載火器塞潮溝賊至火器發大潰奪舟而逃又敗之新墟遂復三城十五年成功復犯南澳六奇襲之於鮑浦生擒賊將蘇興黃亮斬於市十七年以禦賊及捐造戰艦功加太子少保康熙三年考滿晉少傅四年狂僧邱義首告六奇匿桂王子爲壻又與崇正帝子通問

及私開銀礦事靖南王以所告皆誣入奏義伏誅五月六奇卒
先是蘇利復叛勦平碣石之後六奇疏言碣石旣平毋須設鎮
且臣乃潮人亦不宜久官鄉土請調別省事下兩藩及提督議
議未定而六奇卒矣至是平南王尙可喜疏稱六奇所屬汎地
最爲衝險所部兵俱投誠隨帶頻年恢剿招徠築城造艦不遺
餘力今已物故其子啓豐乃將士宿所推服請令統率部議總
兵無世襲例特旨卽令吳啓豐管轄不爲例贈少師兼太子太
師賜祭葬諡順恪祀鄉賢弟標連州遊擊擢江甯鎮中軍參將
長子啓晉順治丁酉舉人次啓豐後貴州安籠鎮總兵次啓鎮
黃岡副將次啓爵自有傳

王士正香祖筆記海寧孝廉查伊璜繼佐崇正中名士也嘗
冬雪偶步門外見一丐避廡下貌殊異呼問曰聞市井有鐵
丐者汝是否曰是也能飲乎曰能引入發醅坐而對飲查已
茗芋而丐殊無酒容衣以絮衣不謝逕去明年復遇之西湖
放鶴亭下露肘跣行詢其衣曰入春不須此已付酒家矣曰
曾讀書識文字乎曰不讀書識字何至爲丐耶查奇其言爲
具湯沐而衣履之詢其氏里曰吳姓六奇名東粵人問何以
丐曰少好博盡敗其產故流轉江湖自念叩門乞食昔賢不
免僕何人敢以爲污查遽捉其臂曰吳生海內奇士我以酒
徒日之失吳生矣留與痛飲一月厚貲遣之六奇者家世潮

陽祖明世爲觀察以擢補故遂爲寔人旣歸粵寄食充驛卒
稔知關河阨塞形勢會王師入粵遲者執六奇六奇曰請得
見大帥言事旣見備陳諸郡形勢因請給遊剗數十通散其
土豪所至郡縣壁壘皆下帥上其功十年中累官至廣東水
陸師提督孝廉家居久不復記憶前事一日有牙將叩門請
謁致吳書問以三千金爲壽邀致入粵水行三千里供帳極
盛度梅嶺已遣其子迎候道左所過部下將吏皆負簡抱弩
矢爲前驅抵惠州吳躬自出近導從雜沓擬於王侯至戟門
則蒲伏泥首登堂北面長跪歷叙往事無所忌諱入夜置酒
高會身行酒炙歌舞妙麗絲竹迭陳諸將遞起爲壽質明始

罷自是留止一月裝累鉅萬將歸復以三千金爲壽錦綺珠
貝珊瑚犀象之屬不可貲計查旣歸數年值吳興私史之獄
牽連及之吳爲之營救查遂獲免於難初查在惠州幕府一
日遊後圃圃有英石一峯高式丈許查深賞異之再往已失
此石問之則以巨艦載致吳中矣今石尙存查氏之家

查伊璜敬脩堂同學出處偶記己亥余客長樂潮鎮吳葛如
以厚幣邀余至其軍爲語南鄙夙昔艱難諸狀葛如能詩自
比武侯故以六奇爲名大率用兵以計勝顧名知之矣時令
其長君啟晉晉弟啓豐偕侍余座晉字長源啓豐字文源長
源已登丁酉賢書生而韶秀玉立工詩所至輒流連興懷古

昔疾行五指篇什繁富不勝舉也余嘗叙其爲文有關戢安
之大者嗣余詩可之選凡仕宦遊歷所賦無不及之專佚東
粵遂入葛如澧陽峽一詩別久之投余遠問則葛如病長君
已修文去矣葛如隨物故世傳余初有一飯之德葛如方布
衣野走懷之而思厚報其實無是事也 吳騫拜經樓詩話
謹案六奇貧時遇查繼佐事世皆艷稱吳騫拜經樓詩話
引繼佐語謂實無其事然王士正撰六奇別傳及鉅琇粵
觚言之鑿鑿英豪未遇乞食而逢知己自古有之特六奇
之賢不繫于此耳故採其說而並存之

吳漢字茂伯別字廣如豐順人六奇從弟也原籍海陽豐政都少

遭寇亂避居潯洲都之大麻遂爲大麻人當明運鼎革與六奇同舉義平三河城殺賊首劉良機平大埔城逐江龍進平程鄉平遠鎮平三縣降諸儲以勞推三河城守順治六年清兵由閩入粵漢承六奇命率部下至平和迎接謁南平靖南二王授參將銜管潮州城守兵務郝尙久叛監鑄火炮督造戰船先導陷陣以功授饒鎮右營參將管黃岡大城所西林兵務康熙元年陣斬長髮賊林阿斗及其衆百餘二年招降南澳僞鎮杜輝吳陞張雄林景福江美鰲等暨其麾下百餘以功授左都督銜加榮祿大夫調瓊州副總兵官以風疾致仕卒年七十有五子二十二人長啓鳳從征泉州陣亡贈宣武將軍次啓燧出繼其兄

海以功加左都督四啓虬字雲源年十七登康熙丙午科武鄉
榜謁選得陝西甯夏衛千總歷署本衛守備以督浚大清渠有
功實授甯夏掌印守備五十四年呵喇蒲坦叛逆辦軍裝運糧
草竭力經營賊平加二級兼遊擊事愛民恤兵合鎮仰若父母
以年老告休至雍正丙午年七十七歲重宴鷹揚踰年卒

陳德靜字定初大埔澣梓村人生有膂力明運滄桑衆推爲石樓
寨長順治三年擒賊首羅輝倫以功授龍巖守備加懷遠將軍
任滿歸康熙十三年閩寇田養民統衆抵埔知縣劉毅志扎請
德靜守東門寇陰使衆持竿度城德靜知其將用雲梯遂夤夜
縋城出挾去東門石橋復登城使人以油筒火箭擊之賊遂遁

子思鄒康熙二十九年歲貢

黃承箕字文豹饒平隆眼城都人爲海陽庠生少家貧父遭難箕多才苦學舌耕奉母中順治丁酉科第六名舉人康熙庚戌成進士爲人謹厚不事華靡雖登第恂恂如諸生爲孝廉時母又死干水終身哀痛殿試後家未幾而卒

蕭翺材字匪棘號石溪大埔白候人順治辛卯舉人戊戌進士授巴陵令有惠政常賦催科勸墾諸什爲時所稱巴故疲難而翺材素方正不善媚上官屢求去已歸題齋聯云早賦閒居自笑宦情真是拙新銘陋室還慚吾德未能馨家居倡置祖業建大小宗祠凡鄉族間雀角多所解息卒年六十著有松存軒文集